

Santa Rosa: Un cunucu fertil pa rehabilita adictonan



ORANJESTAD - ELIZER cu ta un palabra Hebreo cu ta nifica "Dios ta yuda", y actualmente e fundacion ELIEZER ta ehecutando un interesante programa di rehabilitacion pa yuda e adictonan na Aruba.

E programa aki ta tumando luga na departamento di Santa Rosa, caminda un grupo di adicto den proceso di rehabilitacion ta realizando diferente trabou cu tin di haber cu na-

turaliza.

Fundacion ELIEZER tin 12 aña di existencia y nan tin dos aña na Aruba. Nan tin tambe cas na Colombia y Hulanda, unda den pasado nan a yega

di manda nan clientenan. Sr. Gino Frans di e fundacion menciona ta splica cu investigacionnan a demostra cu e adictonan ora cu nan ta traha cu mata y bestia, esakinan ta yuda nan den nan proceso di rehabilitacion.

Na Colombia e tipo di programa di rehabilitacion asina a duna un bon resultado. Nan ta bay den finca of cunucu pa traha cu bestia y matanan, y esaki ta yuda pa e adictonan por relaha nan mente. Pero e tin hopi beneficio, ya cu e persona aki cu a keda isola socialmente dor di su problema di adiccion, ta siña traha bek. Ademas esun cu tin hopi tempo sin traha ta tuma un rutina di trabou, y tambe e actividad aki ta yuda pa fortalece nan autoestima. Ora cu nan ta planta



un mata, of ora cu nan ta mira nan trabou realisa, esaki ta un terapia efectivo pa nan, ya cu nan autoestima ta subi. Ademas cu su autoestima ta subi, e ta produci y trece cuminda riba mesa. "Kiermen e tin hopi beneficiar", asina sr. Frans a declara na BON DIA Aruba. Fundacion ELIEZER a cerca e departamento di Santa Rosa pa asina busca un forma di cooperacion, y nan a acepta. Sr. Gino Frans ta masha agradecido tambe na minister Otmar Oduber cu a sostene e programa di rehabilitacion cu fundacion ELIEZER ta bin realizando na Aruba. Te hasta e mandatario a bay un dia bishita nan pa wak con e trabou aki ta bayendo. Sr. Frans ta reconoce cu Santa Rosa a bay hopi dilanti dor di e trabou cu e grupo di adicto den proceso di rehabilitacion y e trahadonan mes di Santa Rosa ta bin realizando conhuntamente pa e mantencion di e luga aki. "Bo bay awor na Santa Rosa y bo ta mira un cambio grandi", asina el a declara. E ta bisa cu nan a sera un team cu a yuda pa Santa Rosa tambe por bay dilanti.

E hecho cu nan ta planta un mata, wak con e ta nace for di un simia y crece y ta duna su frutanan, ta algo satisfactorio pa esnan cu ta sigui e programa di rehabilitacion di adictonan dor di fundacion ELIEZER. Actualmente e fundacion aki tin cama pa 35 hende, y actualmente nan ta 30 cliente, ya cu nan ta reserva cinco cama pa cualkier emergencia durante fin di siman cu nan mester atende for di departamento di Asuntonan Social. Regularmente personal di e fundacion ELIEZER ta haci

trabou anochi riba caya, y nan ta papia cu e adictonan cayehero. Algun di e adictonan ta conoce e personal di e fundacion ELIEZER, ya cu nan tambe a yega di cay den problema di adiccion y a logra rehabilita exitosamente. Tambe e team di fundacion ELIEZER ta conoce nan pa e trabounan cu nan ta bin realizando durante e ultimo añanan. Pesey sr. Gino Frans ta bisa cu no ta dificil pa nan por yega cerca di e adictonan cayehero, y papia e mesun "lenguahe" cu nan.

Sr. Frans ta haya importante pa nan traha cu e lenguahe di caya di e adictonan cayehero sin palabra sushi, pero si nan uza nan propio terminonan pa localisa e adictonan cu potencialmente por bira nan clientenan. Ademas di uzo di nan mesun lenguahe di caya, nan tin hopi strategia cu nan ta uza cu nan pa asina nan wak si enberdad nan tin un compromiso di cambia nan bida di adiccion.

E ta clarifica cu nan no ta recluta e adictonan, sino cu nan ta invitabo, y bisabo cu nan por yudabo, pero pa e ayudo bo mes por bini. E ta importante pa asina nan por sa si e adicto cayehero berdaderamente ta interesa di haya su rehabilitacion. Nan no ta tuma hende pa loco, ya cu esaki por stroba e programa y ta afecta otro hende cu berdaderamente si ta interesa pa drecha su bida.

Actualmente nan ta bayendo den naturalesa, y nan ta buscando un luga pa nan kita nan clientenan for di ciudad, ya cu nan tin nan cas na Ponton, y nan kier hiba e clientenan mas den naturalesa.